

JATIBIAINOA JONÍ COSHIBAON, JASCAASHON JACON JAHUEQUL ARESTI JONIBAON JAHUEQUESCAMABÍ ITIAQUIN SHINANA

Jascarabo ashonra ja Naciones Unidasnin joni coshibo tsinquishon, jatíshonbi shinanshon, jatíbiain janbíssacana iqui, ja diciembre oshe chonca neteyatian, jainoash 1948 baritian.

Ja shinancana joibora rebestanquin huishacana iqui, ja quirica pei meran icábo. Ja aquin senenhas"honra ja tsinquitabaon, jatíbiainoa joni coshibo yoia iqui, ja shinancana joi jatíbiain janbíssacanti; yoyo ashon, jahueraquí icárin ishon 9nancanon ishon. Requemparira onancanti iquí escuelancoshon, jahueranoquí quirica acanai, jains"honbo. Huestíorashonbi onanyamatira yamaque nato joi, jatíshonbi onancanti riquí; huetsa apoya jonibo ishonbí, jainoas jato namanrí icá mainmea is'honbi; huetsa quesca jonibaonbira onantiquí.

JA JOII ICÁBO ONANTI

ICONSHAMAN SHINANSHON SHINANA IQUI, jatíbi noa mescó jonin baquebo, jascara iquetian huetsabaonribi noa joi nincáshonti iquí. Jaticashbira jacon jahuéqui ati shinanya itiquí. Jatíshonbi moa nato jahuéqui onancanquetianra, jacon jahuéqui aresti tsonbi noa pecáoriamatima iquí; tsonbi noa yancabires jahueatima iquí; jatian jaconma masá teneti nato neten yamatiquí, ja onancanquetiampari.

ICONSHAMAN SHINANSHON SHINANA IQUI, jonibaon jaconma shinanshon huetsabo jaton aresti shinan amayamaa iquí. Jascara shinancanainoasha, jonibaon jahuéqui acainbi huetsabaon jaconmaanresa iquí. Ichara jacanque, huetsaboquí jaconmai shiroaibo, yoina quescaaquin amisaibo, jascaashon jatíbi joni rabinmai.

Icashbi rama iquí joibo moa janbíscana, jacaya jonin quiquinbiresaquin manaa jahuéquibo, jaquí coshinoshon. Jascara copí iquí huetsa joniboquibires raquétan jatima nato neten. Jainoas'h huetsabaonribi mia yonoquin onitsapi imatima iquí, noibatibires j ahuéquiomashoco mia jatima iquí.

Jainoash jatíbi jonira raquétan itima iquí yoyo iquí jahuen queena joi yoií, ishonbi huetsabo jaton shinan jaconmaamatima iquí, ja yoyo icatonin. Jainshon ati iquí queens'hon Diosen joi iconhaquin, iamashon jahueratocayaquí jan oinna icon joi iquí ishon, ati iquí iconhaquin.

ICONSHAMAN SHINANSHON SHINANA IQUI, ja jonin baquebaon ati jacon shinan japaricaya senenhati jahuequescamabi iquetian apon esecan jato aquinti iquí; ja jaconma shinanya jonibaon ja pecáoritaanan jonibo masá tenematimaaquin, jaton aresti shinan jahuequescamaribi iquenbi jato amayamanaquetian. Ja shinan iquí jatíbi jayá iti. Jatian moa jascara masá jahuéqui teneti atipanyamaash ja jaconma shinanya joni betan reteananai, jacon icasi.

ICONSHAMAN SHINANSHON SHINANA IQUI, japaricaya non senenhati jahuéqui, huetsa main icá jonibo betan jaton apobo betanribi noa jaconananash jati.

ICONSHAMAN SHINANSHON SHINANA IQUI, ja jatíbi jonibo ja Naciones Unidas tsinquítaiain icábaon yoicana iquí huestiora Quirica huishá meran; huestiora huestiorabo iquí jahuequescamabi jaton queena jacon jahuéqui aresti. Jainoash jatíbi joniboribi iquí jahuequescamabi, yoyo icaitian huetsabaon nincáresti. Ja huestiora jonibo iquí jahuéqui ati shinanyabo, jainoash ainbobo jascáribi iquí benbo quescaíribi. Ja Quiricaninra yoicana iquí, jatíbi jonibo aquinti, jaticashbi jaconash jacantiaquin; jainoash jaton icábo jaconi beboncatiaquin, jatian bebon quirica onanribi icantiaquin.

ICONSHAMAN SHINANSHON SHINANA IQUI, ja huetsa maimeabo ja Naciones Unidasnin coshibaon aquinananoshon yoicana iquí, ja jatíbi nato maimea jonin jaton aresti jacon shinan senenhacanon ishon, jahuequesca ishon huetsabaon jascara shinan pecáori amanaquetian.

ICONSHAMAN SHINANSHON SHINANA IQUI, ja yoia senenhaquin jatíbi apobaon requenpari ati iquí, jatíbi jahuen jqnibo onanmaquin, huestiora huestiorabo. Non jacon jahuéqui acaitian huetsabaon noa oinrestiquí noa onsatanquin. Jaton queena jahuéqui arestira jahuequescamabi iquí, ja shinanra tsonbi pecáori atima iquí.

Jascarabo iquetian shinans'honra

JATIBIAINOA JONÍ COSHIBO TSINQUISHON

NATO HUISHACANRA ONANTIAQUIN YOIAI JA JONIN BAQUEBAON JACON JAHUEQUI ARESTI SHINAN iquí jaticashbi ja shinanya iti; huestiorabira ja shinanhoma itima iquí nato neten. Huetsa maimea apobaonra jahuen jonibaon jascara jacon shinan aresti onanshon senenhati yoiti iquí, jatíbiain. Jascara acantira jato jatíbiain yoiti iquí, escuelancoshon jato asheacanon ishon, jainshon jato qeshanquin rebesti iquí, jatíshonbi onancanon ishon; jainshonribi onancanti iquí, jascatash ja esébo onanas'h noa jati.

ARTICULO 1.

Jatíbi joninra huetsa jonibaon yoiai nincáresti iquí, jahueraquíbi jaconmai iamaquin; jainoash jahuen queena jacon jahuéquibo ati jahuequescamabi iquí, tsonbira amayamatima iquí. Jaticashbira jascara aresti jacon shinanya iti jahuequescamabi iquí, jahuequescarainoash picota joni inonbi. Huestiora huestiorabora jahuéqui ati shinanya iquí; jainshon onanribique jahueratoquí jacon iquí jainoash jaconma iquí ishon. Ja copira huetsa jonibires inonbi non jato jaconharesti iquí, non huetsabi non acai quescaaquin.

ARTICULO 2.

Jahuequescashonbira tsoabi non amayamatima iquí nato Huishá meran yoia quesca acasaitian, benbo imaash ainbo inobira non jato amaresti iquí. Jainshonra non amaribiti iquí huetsa quesca jonibo inonbiribi, jahuequesca jisá yoraya iquenbi; jahuequescati yoyo icai inonbi; jaton acátoninbiribi Diosquiriti icá joi iconhacanaitian jato amayamatima iquí; huetsa apobires chibanaibo inonbi, jahuen. Éí shinanbiribi huetsaresibi iquenbi; huetsa maimea joni inonbi; jato namanrí quiquinmashoco inonbi, jahuéquioma joni inonbi, huetsa jahuéquibires inonbi jato amayamatima iquí, jatíbi jonibo.

Jainshonribira non jato amayamatima iquí, jato namanbires icá mainconia joni, jainoash huetsa mainconia joni inonbi, non jato amaresti iquí.

ARTICULO 3.

Huestiora huestiorabora jati jahuequescamabi iqui, tsonbira retetima iqui, jainoash jahuen queena jacon jahuéqui ati. Jainoashshibi quiquinbiresi jatoqui chipoti iqui, tsonbi jaconmatima shinanash.

ARTICULO 4.

Tsoabira itima iqui copí biimabi huetsabores ashoni yanca yonocaati; quiquinbires atima jahuéqui riqui, joni iboashon inaati.

ARTICULO 5.

Tsonbira huetsa joni, yoinna acai quescaquin jaconmaquin masá tenemati yamaque.

ARTICULO 6.

Huestiora huestiorabora huetsa jonibires acai quescaquin jaconhaquin apon ati iqui, jahuequescarain joni caa inonbi.

ARTICULO 7.

Ja non mainmea esé copira apobaon jatíbi joni huetsabo acai quescaaribaquin shinanti iqui. Jainshon jato coiranti iqui, huetsa quesca jonibo inonbi. Jainshonnbira coiranti iqui, huetsabaon jatiribibo jaton queenabo nato Huishá meran yoiái quesca acasainbi amayamanaquetian.

ARTICULO 8.

Jahuetianqui huestiora joni yancabires jaconmacanai apon esé meran yoiái quescámaquin jara jahuequescamabi iqui, coshiboiba ja cati. Ja joni coshibaonra aqinti iqui, ja huetsabaon yancabires j aconmaitian.

ARTICULO 9.

Tsonbira yataanan cárcel meran huetsabires niatima iqui, ja apon esecan yoiái quescáma acá onanshonmabi. Jainoash jahuen mainmeashbi tsoabi potaacatima iqui, apon esecan yoiái quescáma jaconma acáma icás'h.

ARTICULO 10.

Huestiora jonin jaconma acá yoicanquetianra, jahuequescamabi iqui, ja apon jascaati yoia acaiton jato yocáyompariti, iconmeiniqui ishon onannoshon. Jainoash jonin yoiabi huetsa yoitimaitianra, jahuequescamabi iqui, ja apon jascaati yoia acai joniiba queenash jabo cati, jan aquinnon icash. Jahuequescamabiribi iqui ja jonin icha naposhon jato benschoshonti, ja copi icanai jahuéqui. Jascaashon onantí iqui, jahueratonacayarin ja yoia joi icon ishon jainoash jahuerato jahuéquiboqui apon esé meran yoiái quescáma iqui ishon, onánoshon. Ja apon jascaati yoia acai jonin jato benschoshonti iqui senenbires, huetsa quesca jonibo inonbi. Jainshon huetsabicho aquinshon huetsa aquinyamatima iqui. Jahuequesca ishon jahuen onana joni iquetian ati iqui jabicho aquinquin. Jainshon aquinon is'hon copíaa iquetianbiri, jahuequesca is'hon huetsa jahuéqui copíboribi; ja apon jascaati yoia acaiton jato jascaatima iqui, senenbirescaya jato aqinti iqui.

ARTICULO 11.

Huestiora jonin jaconma acá yoicanquetianra joni coshibaon shinantimapari iqui, acona riqui ishon. Jascaashon huetsabo ja oinnabo yocáyompariti iqui, aconarin iamaash acámarin ishon onános'hon. Jascara jonira bamaacanti iqui joni icha sharanshon, ja apon esecan yoiái quescaquin, jatianra coshibaon acona onanshamanshon bamaati iqui.

Jainshon huestiora jonin atiqui huestiora jahuéqui ja atima apon esecan yoiamapari jahuéqui. Jatian moa jascara acá pecáo apon esé picoti iqui, jascara jahuéqui jahuescashonbi atima; jatianra apon ja joni masá tenemati yamaque, jascara esé picotamatian acá iquetian. Jainshonribira jato atí iqui masá tenemaquin, ja jaconma aquetian masá tenemati apon esecan yoiái quescáres. Jainshon moa jascara jaconma acá pecáo, huetsa esé apon picoti iqui, jascara jonibo bebonbires masá tenemati; jascara iquenbi ja bená esecan yoiái quescá atima iqui, jascara esé picotamatian acá iquetian.

ARTICULO 12.

Tsoabira huetsabaon jahuéqui acai sharan niacaatima iqui icasquin jato yocatashmabi. Jainoash jahuen rarebo sharanbira itima iqui yocatama icáshbi, niacaati. Jainoash jaton s'hobonbira itima iqui jiquii, jiquicasquin jahuen ibobo yocatashmabi. Jainoashshibira, huetsabo quirica bemacana jahuen ibo yocatamashonbi jahuetianbi yoyo atima iqui. Jainoash huetsabo yoií jaconmai itima iqui; jaton icáribira jaconmaquin yoinaantima iqui. Jascara jahuéquibo huestiora joni acanaitianra apon aqinti iqui, jaquiribi ahuetásyamacanon ishon; jainshon jan acá joni masá tenemashontiqui ja acá copi, ja apon esé meran yoiái quescaquin, huetsa quesca jonibo inobira jato apon aqinti iqui.

ARTICULO 13.

Ja icá maincobi icashbi huetsancobo joni catira jahuequescamabi iqui. Jainoash jahueranoqui jatin queenai, jahuen queenai mai catótira jahuequescamabi iqui.

Huestiora huestiorabora ja icá maimeash queenaash huetsa main cáí picóti jahuequescamabi iqui. Jainoash huetsa main caash jaquiribi jahuen mainco joribatira j ahuequescamabi iqui.

ARTICULO 14.

Ja icá maincos'honbi joni jaconmaquin acanara jahuequescamabi iqui, huetsa main caash jainoa apoqui chipóti. Jascataitianra jainoa apon aquinti iqui, jaconhain jatiaquin.

Icashbi jaconma jahuéqui aquetian, jainoash nato Naciones Unidasnin yoiái quescá esé senenhayamaquetian, jaconmaquin acana caquetianra, huetsa maimea aponbi jain imatima iqui, jahue jahuéquibira menitima iqui.

ARTICULO 15.

Huestiora huestiorabora jahuequescamabj iqui jaton icá mainconia jonishamanbi ití.

Jahuen mainmea apon esé senenhaitianra, jainoa apon shinantima iqui, moara nato mainmeama iqui ishon. Jainshon jahuen aresti jacon shinan pecáoriamatima iqui, jahuéqui acasaitian amayamatima iqui, jahuen queena abánon ishon. Jainoash, joni tashquetash huetsa mainmea icasai tianra, tsonbi imayamatima iqui.

ARTICULO 16.

Moa anii senenas'h jatibi joni, ainbo benooma jainoash benboribi huanooma jainoashibi benomaata ianan huanomaata icásha jaton queenbo be tan bianananti jahuequescamaj iqui; icashbi potábicho, jascatash jati iqui jatonbiribi. Mescó jisa joni iquetian oinshonra tsonbi imayamatima iqui, huetsa mainmea joni iquenbi; Diosquiritti icá mescóas'hon joi iconhai joni iquenbira imati iqui. Ja benbo huanooma ianan ainbo benooma, jainoash benomaata betan huanomaatabo icásha, jahuequescamabj iqui, jahuen queenbo betan biananantí; icás'hbi potábicho ja ainbaon benbon acái quescáribiaquin shinanaítian. Ja moa biananashonra, ja rabéshonbi jaton queena jacon jahuéqui aresti jahuequ,scamabi iqui. Jatibi jonira ainbo betan benbo inonbi moa biananana pecáo, jahuequescamabi iqui potaananribiti, jascatash potaananti apon esé meran yoiái quescá iquetiamparíes.

Tsonbira huetsa joni, ianan ainbo inonbi teaboshon biananamatima iqui, ja bianananti quiquini queencanamapari iquetian.

Jonibo sharan riqui non papa, tita jahuen baqueboya, ja iqui huestiora rarebonin tapon, jainoash rarebo peocootash caitai icásh. Jahuen papa betan jahuen titanra baquebo asheati iqui, jahueratoqui jacon iqui, jainoash jahueratoqui jaconma iqui ishon; jaton papan jascaá jatibi onani jonin baquebo beboncaresti iqui. Tsonbira jahuen papa betan tita yocatamas'honbi baque bichintima iqui, onanhanonshon, iamaas'h yometsoquin. Huetsabaon jascaai jonibora apon aquinti iqui, bichincantimaaquin.

ARTICULO 17.

Huestiora huestiorabora ití iqui jaton mai iboaabo; jainoash huestioratoninbicho iboaabi jahuequescamabi iqui, jainoash ichashon iboati jahuequescamaribi iqui.

Tsonbira huetsa jonin iboaá jahuéqui bichintima iqui, yancabires, jahue jahuequi copimabi.

ARTICULO 18.

Huestiora huestiorabora jahuequescamabi iqui, jahueratoqui jan shinana icon iqui ishon shinanshon joi iconhati. Jainoash jahuen queena quescashon mescóashon Dios rabiti. Jainshon jan iconhai joi jeneshon, huetsa joi ja icon jisá iquetian shinanshon ja joi chibanara jahuequescamabj iqui. Janbichoshonbi iamaash ichashon inonbi jan iconhai joi huetsabo onámátira jahuequescamabj iqui. Jatora onanmati atipanque asheaquin, jainshon jahuen icátonin, jainshon jascaashon rabiaitonin, jainoash ja joi chibanai icásh jascara ití ishonquin.

ARTICULO 19.

Huestiora huestiorabora jaton shinanabobiribi yoyo ití jahuequescamabi iqui, jainoash jan shinana quescábobiribí jato yóiti. Tsonbira huetsabo jaton shinanabiribi yoyo icaitian jaconmaanrestima iqui. Jainoash huetsabaon shinana joibo onanti jainoashshibi huetsabaon jaton shinananbi huishacana, jascarabo onancantira jahuequescamabi iqui. Jainshon jahuen shinana joibo j atíbiain jato asheatira jahuequescamabj iqui, j ahuequescaquinqui jato as'heacasai, jascaashon jato ati. Jainoash huishacanribi, shinamanbi jato yoianan, radio meran, jainoash huetsa jahuéquininbires inonbi jato asheati, jahuequescamabi iqui.

ARTICULO 20.

Jatibí jonibora huetsanconíashbires jainoash huetsabo betanbires jaton queena atí shinanosh tsinquítí jahuequescamabi iqui. Jainoashshibi huetsabo betan rabéshon jahuéqui atira jahuequescamabj iqui; icashbira ja tsinquíshon jaconmamisti picocanaincoresa itima iqui.

Tsonbira huetsabobires teashon jato betan rabéti imatima iqui, queenyamacanaítian

ARTICULO 21.

Huestiorahuestiorabora jahuequescamabi iqui jaton maimeash coshi jiquití. Itira atipanque ichashon apo imacana, iamaash jabiribi ponteshon imacana. Jainoash huetsabo betan jaton coshi catótira jahuequescamabi iqui.

Huetsabaonbires atí jahuéqui, jonibaon jaton jeman icá arestira jahuequescamabí iqui; nescaraincobo, caritiran niti, plasain yacáti, caron pasiani cati, jainoash huetsa quescá jahuéquibires atí inonbi atira jahuequescamabi iqui.

Jaton queena quescáshamanhaquin coshibo ishon jan jato ashonti joni catócantira jahuequescamabi iqui. Ja moa anii senena joniboresa ití jahuequescamabi iqui, jainshon jonibo coshi imanoshon catótiain

jiquishon, jahuerato joniqúi jahuen coshi itin queenai ishon jonéshoco yoiti. Jahuetianbira huetsabo teashon ja coshi iti jonibo jato catómatima iquí; jaton queenmanbiribira ati iquí ja imati catóquin. Jahuerato joniqúi ichashon ja catócana iquí, ja jonira iti iquí coshi jiquii, jatíshonbi imacana.

ARTICULO 22.

Jatibi joni jahuéquioma itin raquétimara jahuequescamabi iquí. Huestíora mainmea jonibaonra ja maimea jonibo onitsapitaitian aquinyamatima iquí, jascaashon joni coshibaon aquinti yoiai quescaashon. Jainshonribira huetsa maimeabaon aquinti iquí, huetsa mainconiabo onitsapitaitian, jainoabaonbi aquinabi mashcárescanquetian. Jonibaonra huetsabo aquintí iquí, jahuéquinin mashcácanaincobo. Jainshonnbira aquincanti iquí jaton tee benati, jatonbinis'h teetash jacannon ishon; j ainoas'h jascatash jati bens hocaacanon ishonnbí.

ARTICULO 23.

Jatibi joni teetira jahuequescamabi iquí, jainshon jaton queena tee benatiribi. Jainoashshibi jaconash teetiain teetira, jahuequescamabi iquí, jainoash queenash teenoshon benashon nocotira, jahuequescamabi iquí. Jatibi joninra ja teebires aquin huetsan biaitiribi copi bití jahuequescamabi iquí. Jahuetianbira jato teemashon mrescóaquin jato copiatima iquí, jahue jahuéqui copíbi, huetsaresibi joni inonbi, ainbo inonbi; jainoash huetsa jahuéqui copíbi atima iquí, jato jascaaquin.

Jatibi teetai jonin jahuen copí senen bitira jahuequescamabi iquí; jan jahuen ahuin betan baquebo j ahuéquiamati; jahuenbi mashcáyamanon ishon. Jahuetianqui jaconma jahuéqui huinotai jaqui chipóti; jainoash jahuetianqui huestiora jahuéqui jan mas'hcáyoraa acasabi jahuen copí biabi senenyamai, jascarabora apon eséain yoiai quescaaquin aquinti iquí.

Huestiora huestiorabora jahuequescamabi iquí jaton Sindicato acanti (Sindicáto- ichaash rabécana jahuéqui anosh) iamaash huetsabo betan rabetaires jaton tee jacon inon icásh, itira jahuequescamabirib(iquí.

ARTICULO 24.

Jatibi jonira basí teetash tantití jahuequescamabi iquí, jahuen tee jenepariash. Jainshonribira jato nete shehuinmaquin teematima iquí, netetiibi. Jainshonra jahuetio basichaa moa teemashon tantimati jahuequescamabi iquí; ishonbi ja teeyamai neten huetsatianbo copíati iquí.

ARTICULO 25.

Jatibi jonira jahuequescamabi iquí, jan jatiatani iti, jan jahuen yorabi jainoas'h jahuen ahuin betan jahuen baquebo isinaitian raomeemati senen; jan pítí bití senen; chopa bití; ja shoboati senen; benshoamisbo raonmashon jan copíati senen; jainoash huetsa jahuéquiboribi ati senen. Jainshonribira aquinti iquí ja teecomabo, isinaibo, jahuen yora iticoma copí teeyamaibo, benomaatabo, yosishocobo betan yoshanshocobo; jainoash jaconma jahuéqui jahuen shinanamain huinotas'h jan jahuéati yamaquetianribi aquinti iquí.

Titaboya jahuen baquebo jahuéquinin mashcáyoracanquetianra aquincanti iquí. Jatiibi baquebora jahuéquinin aquincanti iquí, ja mashcáyoraabobicho, huetsa quesca jonibires inonbi. Jahuen papa onantima baque jainshon papaya baque inonbira aquincanti iquí.

ARTICULO 26.

Jahuequescamabi riquí jatíbi joni quiricanin asheti. Jainoash quirica aquin primaria senenhatira iti iquí, copímabi ati. Jainoash primariain quirica senenhatira teashon baquebo amati iquí. Jahuerato escuelancoqui jato tee meninoshon quirica onanmai, jatibira jato senenbires onanmati iquí, huetsa quesca jonibo inonbi. Jatíbí jonira huetsa jonibaon acai quescaaribaquín quirica onantí jahuequesmabi iquí, ja bebonbires onantiribí.

Ja requempari escuelancoshon jato onanmatí riquí, jascatas'h benschocaatash jati. Jainshonra jato onanmaribati iquí, jahueratoborin ja huestíorabaon ati jahuéqui jahuequescamabí ishon. Jatian jonibo jacanti iquí, ja asheacana quescatiribí. Jainshonñibira jato asheati iquí jatibiainoa jonibo, huetsabobires inonbí, jatoiba caquetian jato birestiaquin. Jainoas'h noibamissibi icánon ishon, huetsanconía joni inonbi jato betan raenanantí iquí; huetsaresibi jonibo inonbí, huetsaresibiashon Dios rabiabo iquenbi, jato jaconhaanti iquí. Jainshonra jato asheanbati iquí escuelancoshon ja Naciones Unidasnin esébo, ja esé iquí, jascatas'h jaconanash jati yoiai esébo.

Jahuequesca escuela inonbi papabaon catóshon jaton queena escuelanco jahuen baquebo imatira jahuequescamabi iquí.

ARTICULO 27.

Huestiora huestiorabora jahuequescamabi iquí, jahuen jemancos'hon jatíbí jahuéqui acasquin aresti, nato pishta ati, tsinití picotí, ransatí ati, iamash huetsa jahuéquibo aresti, jainoash huetsabaon acainco queenash ití jan benetí acaincobo; jascarabora jahuequescamabj iquí. Jainoas'h jascaaribi iquí jahuéqui ashenoshon escuelancoshon onanti nato quenéati, dibújantí, behua asheti, jainoash mescó jahuequibo; jonin jahuen shinananbi acá asheti, jainoash jonin shinaman acátonin jayátiribi.

Huestiora huestiorabaonra jahuen quirica huishaa coiranti j ahuequescamabi iquí, huetsabaon yocatamashonbi jan acáquescaribaquin huishashon janbi acá yoinaquetian, iamaas'h jahuéqui acá oinnash nocona riquí inaquetian.

ARTICULO 28.

Jarati iqui non apon esé picoa jatíbiain, ja jonibaon aresti shinan, nato Huishacan yoiabo meran icá ati jahuequescamabi inon ishon.

ARTICULO 29.

Jatíbi jonira jaton ja senenhatiabires iqui, jaton jemanconiash. Jascara jaton ja senenhati senenhaira, jainshon jato aresti shinan senenhaira icanti iqui, moa quiquina joni.

Jaton aresti shinan jahuequescamabi anosh, jainoash tsonbi jahueayamati inoshonra, jonibo jaton mainmea apon eséqui coshiti iqui. Ja eséra iti iqui, tsoa joninbi huetsabaon aresti shinan jahuenabicho acasquin masaatima esé. Jainoash ja eséra iti iqui huetsabaon jatíbi jonibo jaconmaquin acaitian coiranti esé, jato jascaayamanon ishon. Jainoash huetsabaona iquenbi jatiribibaon j aconmaannaquetian, iamash j aton mainshon iboaa jahuéquiho huetsabaon jato jaconmaanresnaquetian; j ascarabo jato aquinti.

Quiquinshaman atima jahuéqui riqui, jatíbi jahuéqui aresti jahuequescamabí iquenbi, ja Naciones Unidasnin shinanama quescá atí, ja esé meran yoiái quescá senenhashontíma.

ARTICULO 30.

Tsoa joninbira shinantima iqui, iamaash huetsa mainmea joninbira atima iqui shinanquin, nato Huishá meran icá esecanra yoiái, huetsabaon aresti shinan masaanti jatonabicho acasquin, ishon, jahuetianbira jascaquin shinancantima iqui.